

समां - 12:25 hrs.

<><><><><><>

CM Samnvay

मुख्यमंत्री उमर अब्दुल्ला होरें BISAG-N दे टेक्नॉलोजी आधारित प्रोजेक्टें ते जम्मू-कश्मीर च डिजिटल बदलाव गी दर्शादी इक कताब “समन्वय” दा विमोचन कीता। BISAG-N जेहदा पूरा नां भास्कराचार्य नैशनल इंस्टीच्यूट फॉर स्पेस एप्लीकेशन एंड जियो इन्फॉमेटिक्स ऐ- इलेक्ट्रनिक्स ते सूचना प्रोद्योगिकी मंत्रालय तैहत कम्म करने आहली इक खुदमुख्तायर वैज्ञानिक निकाए ऐ। इस मौके उमर अब्दुल्ला होरें जम्मू-कश्मीर च बी शासन सरबंधि चुनौतियें दे वैज्ञानिक हल्ल तुप्पी देने लेई BISAG-N दी सराहना कीती। उनें आखेया जे जम्मू-कश्मीर दी भूगोलिक स्थिति ते मौसमी हालात शैहरी ते दूर-दरेडे इलाकें च शासन गी इक्के चाली नै पुजाने दे कम्मै च केई रुकावटां ते चुनौतियां पैदा करदे न- पर डिजिटलीकरण कन्नै इनें चुनौतियें गी असरदार ढंगै सिर दूर करने च मदद थहोदी ऐ। उनें आखेया जे एह कॉफी टैबल बुक “समन्वय” टेक्नॉलोजी आधारित पैहलकदमियें गी दर्शादी ऐ- जिन्दे नै जम्मू-कश्मीर च प्रशासनिक कुशलता च बड़ा मता सुधार आया ऐ। मुख्यमंत्री होरें आखेया जे इस कताब दे प्रकाश कन्नै भविक्ख च बी डिजिटल उपलब्धियें दे दस्तावेजीकरण लेई प्रेरणा हासल होग।

<><><><><><>

Dy DM Delegations

उपमुख्यमंत्री सुरिन्दर चौधरी होरें जंदे रोज जम्मू च सिविल सचिवालय च बक्ख-बक्ख सार्वजनिक प्रतिनिधिमंडलें कन्नै मलाटी कीती ते लोकें दियें शकैतें गी तौले दूर करने ते समूलचे जम्मू-कश्मीर च सेवाएं गी सुचारु ढंगें कन्नै उपलब्ध करोआने दे महत्वें पर जोर पाया। बक्ख-बक्ख जिलें दे प्रतिनिधिमंडलें कन्नै गल्लबात करदे होई उ'नें उनेंगी यकीन दोआया जे उन्दे मसलें गी तौले हल करने लेई साजगार मंच पर पुट्टेया जाग। उपमुख्यमंत्री होरें अफसरें गी निर्देश दिते जे ओह लोकें दियें चिंताएं गी तरजीह देन। प्रतिनिधिमंडलें च विद्यार्थी- नौकरी तुप्पने आहलें लोक- इच्छुक उद्यमी- कारोबारी संगठन ते सिविल समाज दे संगठन दे नुमायंदें ते केन्द्र शासित प्रदेश दी बक्ख-बक्ख थारें थमां आए दे केई लोक शामिल हे।



Rana Environment

जंगलात मैहकमे दे मंत्री जावेद अहमद राणा होरें इस गल्लै पर जोर पाया ऐ जे पर्यावरण दी राखी-हिफाजत साढ़ी इक सांझी जिम्मेदारी ऐ। उ'नें औने आहली पीढ़ियें लेई कुदरती संसाधन दे संरक्षण आस्तै किट्ठे रलियै जतन करने दा आहवान कीता। मंत्री होर “ग्रुप ऑफ कन्सर्ड सीटिज़नस” नां दी संस्था दे चेयरमैन हुंदी अगुआई च सरबन्धित नागरिकें दे समूह दे इक प्रतिनिधिमंडल कन्नै मलाटी करा'रदे हे। डेलीगेशन नै पर्यावरण गी पुज्जा'रदे नुकसान बारे चिंता प्रकट कीती ते एहदे संरक्षण दे सख्त उपाएं पर जोर दिता। मंत्री होरें समूलचे जम्मू-कश्मीर च पर्यावरण दी हिफाजत करने- उसी पुज्जा'रदे नुकसान गी रोकने

ते टिकाऊ विकास गी बढ़ावा देने लेई सरकार- सिविल समाज ते मुकामी समुदायें आसेया सांझे जतन करने दी जरूरतें पर जोर पाया।

<><><><><><>

CS Youth Prog.

मुख्य सचिव अटल डुल्लू होरें सोमवारें सारे जिले लेई पूरे बरे युवाएं सरबन्धी कार्यक्रमें आस्तै इक पोर्टल दी शुरुआत कीती। इस जतन दी अगुआई योजना- विकास ते निगरान मैहकमे आसेया कीती जा'रदी ऐ तां जे युवाएं दी ऊर्जा गी सेई दिशा दिती जाई सकै- भामें ओह खेड्द आहला क्षेत्र होए- शिक्षा- हुनर विकास- कला जां संस्कृति होए। मैहकमे गी हिदायत कीती गेई जे ओह जिला ते ग्रामीण सतह पर नेकां गतिविधियें दा सरिस्ता करन तां जे सब्बनैं दी शमूलियत यकीनी बनी सकै। एह पोर्टल औपचारिक तौर पर फरवरी थवां शुरु होग।

<><><><><><>

AP Espionage

अरुणाचल प्रदेश पुलिस जम्मू-कश्मीर दे कुपवाड़ा थमां 2 ते इटानगर थमां 3 लोकें गी पाकिस्तान लेई जसूसी आहले इक मामले दी जांच दे सिलसिले च गिरफ्तार कीता ऐ। अरुणाचल प्रदेश दे कनून बवस्था सरबन्धि IGP चुखू अप्पा होरें जानकारी दिती ऐ जे पैहली गिरफ्तारी 21 नवम्बर गी होई ही- जिसलै नज़ीर अहमद मलिक नां दे व्यक्ति गी कुपवाड़ा थमां हिरासतै च लैता गया हा- ओहदे बाद कीती गेदी पुच्छ-गिच्छ मगरा हासल

जानकारी दी बिनाह पर 4 होर लोकेँ गी गिरफ्तार कीता गया ऐ। उनेँ लोकेँ पर संवेदनशील जानकारी किट्ठी करियै दुश्मन मुख्य कन्ने सांझी करने दा आरोप ऐ। इस मामले च अगगे दी पुच्छ पड़ताल- तश्तीफ ते जांच दा कम्म चलै'रदा ऐ- जेहदे च फॉरेंसिक जांच-परख बी शामिल ऐ।

<><><><><><>

NCC R'Day

जम्मू-कश्मीर ते लद्दाख NCC निदेशालय दे ए.डी.जी. मेजर जनरल अनुपिंदर बेवली होरेँ जम्मू दे नगरोटा च एन.सी.सी. अकैडमी च गणतंत्र दिवस-2026 परेड च शामिल होने आहले दल दी सिखलाई दी समीक्षा कीती। उनेँ कैडेटेँ दे अनुशासन- सांस्कृतिक उत्कृष्टता ते तयारियेँ दौरान उं'दे समर्पण दी सराहना कीती। मेजर जनरल होरेँ कैडेटेँ गी नमीँ दिल्ली च औंदे गणतंत्र दिवस शिवर च उच्चे मानकेँ गी बनाई रखने ते कामयाबी हासल करने लेई प्रोत्साहित कीता।

<><><><><><>